

Visoki predstavnik u Briselu sa zvaničnicima EU



Tokom ovosedmične posjete Briselu, visoki predstavnik Valentin Inzko se sastao sa rukovodećim direktorom za Evropu i centralnu Aziju Evropske službe za vanjsko djelovanje (EEAS) Thomasom Mayr-Hartingom, izjaviteljem za BiH i članom EU Parlamenta Cristianom Danom Predom i drugim zvaničnicima EU.

Visoki predstavnik je na konferenciji održao govor pod nazivom “Evropska Bosna i Hercegovina: Kulturna raznolikost i pomirenje”, koju je organizirao Evropski parlament.

Tokom sastanaka, visoki predstavnik je ukratko objasnio svoje viđenje trenutne političke situacije u Bosni i Hercegovini i izazova sa kojim će se BiH suočavati u budućnosti.

Visoki predstavnik je rekao da političke stranke moraju postići dogovor o izbornoj reformi, što bi omogućilo nesmetano provođenje izbora i implementaciju izbornih rezultata 2018. “Političke stranke i njihovi lideri moraju biti spremni na kompromise i pronaći rješenje. To nema alternativu”, istaknuo je visoki predstavnik.

Također je rekao da je druga ključna oblast u kojoj BiH mora postići napredak vladavina prava. “Želim naglasiti da je vladavina prava, uključujući i borbu protiv korupcije, temelj ekonomskog razvoja, koji je ovoj zemlji prijeko potreban.”

